

Kalaallit Nunaanni pinerluttulerinermi inatsisip aamma Kalaallit Nunaanni eqqartuussisarnermik inatsisip allanngortinneqarnissaat pillugu inatsisissatut siunnersuummut (Tarnikkut nakuuserfigineqarneq pillugu aalajangersagaq immikkoortoq) aamma Pillaasarnermik inatsisip allanngortinneqarnerata ilaanik aamma inatsisip assigiinngitsut allat Kalaallit Nunaannut atuutilersinnissaat pillugu peqqussummut missingiut pillugu Kalaallit Nunaanni Namminersorlutik Oqartussat akuersissuteqarnissaat pillugu Inatsisartut aalajangiiffigisassaattut siunnersuut

(Aatsitassanut Inatsisillu Atuutsinneqarnerannut Naalakkersuisoq)

Saqqummiussissut

(Aatsitassanut Inatsisillu Atuutsinneqarnerannut Naalakkersuisoq)

Siullermeerneqarnera

Inatsisip atuutsinneqarnerannut suliassa qarfiup qaffassarneqarnissaanik Naalakkersuisut kissaateqarnerat tungavigalugu, taamaalilluni suliassa qarfik sunniuteqarluartunngortinneqassamat ullumikkumullu naleqquttunngortinneqassalluni, inatsisissatut siunnersuut manna saqqummiunneqarpoq.

Inuup tarnikkut peqqissusaanut tarnikkut nakuuserfigineqarneq inuttut nammineersinnaanermut annertoorejussuarmik kinguneqarsinnaavoq. Tarnikkut nakuuserfigineqarnerup kingunerit ajortut – ingammik qanigisariinni pisimatillugit – sivisusinnaapput imaluunniit allaat inuuneq naallugu atasinnaallutik, tassami tarnikkut nakuuserfigineqarnerup eqqugaasut tarnikkut innarligassaanninnerat nungujartortittarpa. Taamaammat eqqugaasut taakkulu inatsisitigut naapertuilluartoqarneranik misiginerisa illersorneqarnissaat pingaartuuvoq, taamaalillutik inuiaqatigiinnit illersorneqarneq, paasineqarneq akuerineqarnerlu, pisassartik piniassamatigit.

Tarnikkut nakuuserfigineqarneq qallunaat pillaasarnermik inatsisaanni 2019-imi pinerluutinngortinneqarpoq, aamma Kalaallit Nunaanni Eqqartuussiveqarneq pillugu Siunnersuisoqatigiit 2019-imi ataatsimiinneranni, aalajangersakkap assigisaanik Kalaallit Nunaanni pinerluttulerinermi inatsimmi eqqussisoqarsinnaanera pillugu periarfissat isiginiarneqarnissaat innersuussutigineqarpoq.

Tamatuma saniatigut Arnanut nakuusertarneq angerlarsimaffinnilu nakuusertarneq pitsaaliorniarlugit akiorniarlugillu Europará dip isumaqatigiissutaanik (Istanbulimi isumaqatigiissummik) Kalaallit Nunaanni Namminersorlutik Oqartussat akuersissuteqarnissaat Inatsisartut 2022-imi upernaakkut ataatsimiinnerminni akuersissutigaat. Nakuusernerit suugaluartulluunniit, matumani tarnikkut

nakuuserfigineqarneq ilanngullugu, naalagaaffiit ilaasortaat pinerluutinnortissagaat isumaqatigiissummit peqqussutigineqarpoq. Taamaamat tamakkiisumik isumaqatigiissutip malinneqarnissaanut tarnikkut nakuuserfigineqarnerup pinerluutinnortinneqarnissaa piumasaqaataavoq.

Tamanna tunngavigalugu pinerluttulerinermi inatsimmi tarnikkut nakuuserfigineqarnermik pinerluutinnortitsisumik aalajangersakkamik eqqussisoqarnissaa Naalakkersuisut aamma kissaatigaat.

Pinerluttulerinermi inatsimmi immikkoortumik aalajangersakkamik eqqussineq ineriartornerussaaq nutaarluinnaasoq. Ullumikkut tarnikkut nakuuserfigineqarneq paragraffini qunusaarutitut aamma inatsisit unioqutillugit pinngitsaalinernut ilaatigut malittarisassiuunneqarpoq. Tarnikkut nakuuserfigineqarneq nakuusernertut inatsisillu unioqutillugit iliuusaammat, qanigisariinni nakuusernermut naligiissinneqartoq, immikkut paragraffiliinikkut erseqqissarneqarpoq.

Taamatut oqaaseqarlutik immikkoortup suliarineqarnissaa Naalakkersuisut Inatsisartunut tunniunniuppaat.